

**Suliassaqarfik Aningaasarsiornikkut iluarsiiisuteqartarneq nakkutilliinerlu,
Namminersornermut inatsit naapertorlugu liste II imm. 25, Kalaallit Nunaanni
oqartussaaffigineqalernissaanut Naalagaaffeqatigiinni oqartussanut
isumaqatigiinniarnert aallartinneqarnissaat siunertaralugu saaffiginninnissaannut
Naalakkersuisut peqquneqarnissaat Inatsisartunut aalajangiiffissatut siunnersuut**
Pele Brobergimit, Naleraq, saqqummiunneqartoq

pillugu

Inatsisinut Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini uku inuttarai:

Inatsisartunut ilaasortaq Aqqalu C. Jerimiassen, Atassut, siulittaasoq

Inatsisartunut ilaasortaq Kuno Fencker, Naleraq, siulittaasup tullia

Inatsisartunut ilaasortaq Pipaluk Olsen, Demokraatit

Inatsisartunut ilaasortaq Iddimanggiu Bianco, Inuit Ataqatigiit

Inatsisartunut ilaasortaq Lars Poulsen, Siumut

UKA2025-mi 5. november 2025-mi siullermeerinninnerup kingorna ataatsimiititaliap
siunnersuut misissorpaa.

Siunnersuutip imarisaa siunertaalu

Suliassa qarfiup “Aningaasarsiornikkut iluarsissuteqartarneq nakkutilliinerlu” tiguneqarnissaanik suliniutip aallartinneqarnissaa siunnersuuteqarnermi siunertarineqarpoq, taamaaliornikkut suliassa qarfimmil inatsisiliorneq siunissami Folketingi aqutiginagu Inatsisartulli aqutigalugit pisaleqqullugu.

Siunnersuut akuerineqassappat tigusinissaq pillugu isumaqatiginninniarnit aallartinneqarnissaat siunertaralugu Naalakkersuisut naalagaaffimmi oqartussanut saaffiginnissapput.

Siunnersuutip Inatsisartunit siullermeerneqarnera

Suliassa qarfinnik tigunissat pilersaarusiorduugaasumik isumaliutigineqarluugaasumillu pinissaat siunnersuutip siullermeerneqarnerani tamanit isumaqatigineqarpoq.

Suliassa qarfiup “Aningaasarsiornikkut iluarsissuteqartarneq nakkutilliinerlu” pisariunera aammalu suliassa qarfik pillugu immikkut ilisimasaqarnissamik piginnaasaqarnissamillu pisariaqartitsiviunera tamanit isumaqatigineqarpoq. Tassunga atatillugu suliassa qarfimmik ingerlatsisinnaajumalluni suliamik piginnaasaqarnerit nunatsinni maanna pigineqarnerisut ernummatigineqartoq oqaatigineqarpoq.

Suliassa qarfinnik tigusinissamut ataatsimut erseqqissumillu pilersaaruteqarnissaq partiit ilaasa kissaatigaat. Tamatuma peqatigisaanik nassuiaatit suliarineqartussatut Inatsisartunit aalajangerneqareernikut naammassillugit suli suliarineqanngitsut pilersaarusiortoqarnissaanik pisariaqartitsineq tamatigut innersuussutiguarneqarsinnaanngitsaq taamatuttaaq oqaatigineqarpoq.

Akissussaaffeqarfinnik tigusinissat sukumiisumik piareersaasiortoqarnera tunngavigalugu pissasut Naalakkersuisunit nalinginnaasumik kaammattuutigineqarpoq, tassa Naalakkersuisut isumaqarmata suliassa qarfimmik tiguisoqassappat nammineq allaffeqarfissanik Finanstilsynitut il.il. ittunik pilersitsisoqartariaqassamat. Naalakkersuisunittaaq erseqqissaatigineqarpoq suliassa qarfimmik tiguisoqaraluarpalluunniit nunani tamalaani malittarisassat periutsillu suli malinneqartussaassasut. Tamanna tunngavigalugu Naalakkersuisut allannguutissatut siunnersuut imaattoq saqqummiuppaat:

”Aningaaseriveqarnermik malittarisassiornermik nakkutilliinermillu tiguisinnaanerup UPA2023/142-p aamma 143-p suliarineqarneranni Inatsisartut aallartissallugu aalajangigaannut nassuiaammut ilanngunneqarnissaanik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut.”

Partiit arlallit Naalackersuisut allannguutissat siunnersuutaat taperserpaat, tamatumali ataatsimiititaliami nangillugu oqaluuserineqarnissaa kissaatigalugu. Tamanna tunngavigalugu siunnersuut ataatsimiititaliamit suliarineqartussanngorlugu nassiunneqarpoq.

Siunnersuutip aningaasaqarnikkut kingunerisassai

Aalajangiiffigisassat siunnersuutit piviusunngortinneqarneranni aningaasaqarnikkut allaffis-sornikkullu kingunerisassat siunnersuutip tunngavilersuutitaani nassuiaatigineqartassat Inatsisartut suleriaasianni § 33, imm. 1-imi allassimavoq.

Siunnersuut piviusunngortinneqarpat aningaasaqarnikkut kingunerisassat nalunaarneqarsimasut ataatsimiititaliamit maluginiarneqarpoq, taamaalilluni aningaasartuutissat tamarmiusut kisitsit 2015-imeersut tunngavigalugit 900.000 kr.-inut missingerneqarlutik. Ersarivissumik allassimanngilaq aningaasanik taggiineq tigusinissamorpiaannaq tunnganersoq, taamaattumillu suliassaqrifiup tiguneqarnissaanut allaffeqarfiit pisariaqartinneqartut pilersinneqartussat annertunerussasut taamatuttaaq naatsorsuutigineqartariaqarpoq, tamannalu malillugu ingerlatsinermut ukiumoortumik aningaasartuutissat missingerneqartussaallutik.

Siunnersuuteqartup aningaasat missingigai Naalackersuisunit aalajangersimasumik isummerfigineqarsimanngitsut ataatsimiititaliamit maluginiarneqarpoq.

Ataatsimiititaliap siunnersuummut oqaaseqaatai

Suliassaqrifik “Aningaasarsiornikkut iluarsisuteqartarnek nakkutilliinerlu” pisariusoq aammalu immikkut ittumik ilisimasaqrifiullunilu piginnaasaqrifiusariaqartoq ataatsimiititaliamit oqaatigineqassaaq, piginnaanerillu taakku maanna sulisuusunit pigineqareernersut maannangaaq allassimanani.

Suliassaqrifiup tamatuma tiguneqarnerani suliassaqrifiup isumagineqarnissaanut allaffinnik pilersitsisoqartariaqassasoq, taamaalillunilu aningaasaqarnikkut allaffisornikkullu aningaasanik atuiffiusariaqassasoq ataatsimiititaliamit maluginiarneqarpoq.

Taamatuttaaq suliassaqrifinnik tigusisoqassappat tamanna sukumiisumik pilersaarusiornikkut isumaliutiginninnikkullu pissasoq partiit arlallit siullermeerinninnermi kissaatigigaat ataatsimiititaliamit maluginiarneqarpoq.

Suliassaqrifiup tiguneqarneratigut nunatsinni suliffeqarfinnut aningaasaliisarnermi periarfissat pitsaanerulissanersut, periarfissat taakku maanna sinaakutissatigut pigineqareernersut imaluunniit sinaakutissat taakku suliassaqrifimmik tigusinngikkaluarluni

pitsanngorsarneqarsinnaanersut ataatsimiititaliamit oqaluuserineqarpoq.

Kiisalu suliassaqarfinnik tigusinissaq pillugu nassuiaat sularineqalersoq Naalakkersuisunit paasissutissiissutigineqartoq ataatsimiititaliamit maluginiarneqarpoq. Aalajangiiffigisassatut siunnersuut Inatsisartunit siusinnerusukkut akuersissutigineqartoq tunngavigalugu tamanna pivoq. Tamanna tunngavigalugu suliassaqarfimmik “Aningaasarsiornikkut iluarsiiisuteqartarneq nakkutilliinerlu” tigusinissap Inatsisartunit isummerfigineqannginnerani nassuiaatip taassuma utaqqimaarneqarnissaa naapertuunnerpaassanersoq ataatsimiititaliamit oqaluuserineqarpoq.

Ataatsimiititaliap inassuteqaatai

- Ataatsimiititaliami amerlanerussuteqartut Demokraatineersut, Inuit Ataqatigiinneersut Atassummeersullu Naalakkersuisut allannguutissatut siunnersuutaat **akuerineqassasoq** aammalu siunnersuutaqqaartoq **itigartitsissutigineqassasoq** inassutigaat.

Ataatsimiitaliap taama oqaaseqaateqarluni isumaliutissiisummilu allassimasutut paasinnil-
luni siunnersuut aappasaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Pipaluk Olsen

Iddimangiiu Bianco

Lars Poulsen